

Estd

1997

# Z.B.Y.F. TAANGKO

(An Organ of the Zomi Baptist Youth Fellowship)

LOM - X1 : HAWM IX v MONTHLY BULLETIN v September 2010



## ZBYF IN KUM 22 CING TA

| <i>A Sunga thu om te</i>                                | <i>Laimai</i> |
|---|---------------|
| 1. Ka Ngaihsutna<br><i>-Tg. Pauboih</i>                 | -1            |
| 2. Kha Thu ah kiseek<br><i>-Sm.Awi Ngaih Lun</i>        | -3            |
| 3. Murlente hong kici maw<br><i>-Tg. Lian Muan Kham</i> | -4            |
| 4. ZBC Area Khawmpi tung ding                           | -5            |
| 6. ZBYF kum 22 cing<br><i>-Secretary, ZBYF</i>          | -6            |
| 7. Lungdamkohna<br><i>-ZBC Secy. Zokhawthar</i>         | -7            |
| 8. Rev. Dr. JM Paupu in letsong                         | -7            |
| 9. BSI in Book Shop neih phalsak                        | -7            |
| 10. Kuatan bang gen?                                    | -8            |

## **EDITORIAL BOARD**

### **Editor :**

*Awi Ngaih Lun*

### **Joint Editors :**

*K.Lang Kap*

*Z.L.Thang*

### **News Editors :**

*Rev. Cin Khan Tuang*

*Sia Kham Suan Pau*

### **Cir. Manager :**

*Mamuang*

### **Tech. Assistant :**

*Tin Sawm Lian*

## **ZBYF MAKAITTE**

**(2008 - 2010)**

### **President :**

*K.Lang Kap*

### **Vice President :**

*Kham Suan Pau*

### **Secretary :**

*Awi Ngaih Lun*

### **Recording Secretary :**

*Z.L.Thang*

### **Asst. Rec.Secretary :**

*Thang Lian Mung*

### **Ex-Officio Member :**

*Rev.Suan Khan Thang*

### **Committee Member te :**

1. *Nang Sian Mung*
2. *Kap Go Thang*
3. *Thawng Za Muan*
4. *Khup Khan Pau Ex-Hav*
5. *Tg. N.K.Hau*

## ***Editorial...***

‘Thahat’ cih ciangin thatang hat, lungsim ngaihsutna hat ci in i khia ding hi. Thahat ki ut ciat ahih manin zatui zaha kine in, nek leh dawn lim nono kine hi. Deih mana ngah theih hi lo napi Pasianin a lamdang takin khangnote minthanna dingin thahatna pia se citciat hi.

Khankhat nuntak hun sungin khangno hun pen thahat pen hun ahi hi. Khangno tampi in hatna a pia Topa ahih lam theilo in tualthah, guktak, thagum hatna tawh mi siatna bawl in, guitheihte hih ahih manin mite lipkhap suakin, mi tampite adingin dipkuatna piangsak hi. Innsung bangkua, khuasung leh gamsung buaisak uh ahih manin a thahatna in amah maimialsakin Topa Pasian min daisak hi.

Pasianin khangnote adingin thahatna hong piak a lawhcin theihna dingin pilna zonna lamah hahkat takin zat a, a nuam ah hita leh a nuam lo ah zong sem kankan a, nek leh taak zonna ah zong limtakpi mahin na sem ding leh a siangtho nuntakna tawh nuntak zawhna ding in pan lak kul hi.

I khangno thahatna in eimahah minthanna hong guan hen la, thahatna hong pia Topa phawk den ni. ‘*Khangnote thahatna pen amau minthanna hi*’ Pau.20:29.

## **Newsweek list ah PM Singh**

Newsweek Magazine in leitung gam makai hoih 10 a telna ah Prime Minister Manmohan Singh in khatna ngah hi. PM Singh in gam a makaih dan panin makai deihhuai hi, ci in Newsweek Magazine in gen hi. Kum 77 mi, Singh in kum 7 PM hihna leen ta a, kum zalawm 21 na a leitung gam nasem thei te sunga India gam a khangtosak mahmah te sunga mi poimawh hi in gen hi.

A mizia pen deihhuai a, leitung makai dangten a thupisim mahmah, mi kiniamkhiat, ne gu ngei lo leh a siangtho hi in gen hi. Kam a pau ciang zong dam takin pau hiathiat zel a, hi pen political leader te hihna ding zia dinga a ettehtaak khat hi.

## **E-mail&SMS in sum zawn tam**

Surekha Marandi leh RBI Dy. General Manager (NE), A Bhaskara Rao te in e-mail leh SMS tung tawna sum ngah theihna om hi in gen a, kuamapeuh hibangah kidop kul, ci hi. RBI makaite in, e-mail, SMS leh na dang zangin sum tampi tak mat theihna thu om thei zel a, mi tampi in buai lawh khin a, sum iplahna

hangin mi khenkhatin a bank account nambat leh credit card nambatte hih uh a, tua panin mi in sum lakheh thei zel cih gen hi. Hi bang dan a nasepna Mizoram, Nagaland leh Manipur ah tam mahmah, ci hi.

Surekha Marandi gen danin, e-mail leh SMS tungtawnin foreign lottery ah sum tampi mat ding a om thu kithangsak zel a, ahih hangin Foreign Exchange Management Act gen bangin, India mi adingin phalna nei loin foreign lottery ah kihel phal hilo hi.

## **Two Wheeler Taxi bawl sawm**

Mizoram Transport Authority te in a gam sunga khangno tan 10 zo nasep mu zo lo te adingin Two Wheeler taxi bawl ding thukim hi. A tungin etkhiatna dingin mi 50 tungah permit pia ding cih thu kiza hi.

## **Mi 8000,000 phak theih loh**

Pakistan gama tuikhang hangin mi 800,000 khawng omna pai theih loh ci in United Nations in gen hi. Vanleng tawh lo hih mite hut theih dan ding om lo hi. Amaute pii nadingin US galkapte in helicopter 19 sawl a, UN in 5 sawl hi. Pakistan tuikhang hangin mi tampi in a nuntakna uh tanlawh ta hi.

To

---

---

---

From :-

ZBC Office,  
Bethel Veng,  
Champhai -796 321  
Mizoram, INDIA

## KA NGAIHSUTNA

-Tg. Do Suan Pau, B.A. Ist. yr. Student

ZBC kum 27 cing ta hi. Mihing bang hileh picing mahmah ta a, laisimna lamah M.A. Ph. D bang zo ta ding hi. I pawlpi sungah picing tampi om a, ahiah hangin khantohna lama picing taktak kitam nailo hi. ZBC pawlpi akiphot cilin Pasian thu leh i kampau zat ding bek a kiphuan ahiah ding ka lam en kei a, mailam saupi ngaihsutna tawh i mipihte khantohna ding zong ngaihsutna nei, hi ding hi. Bang hanga ZBC pawlpite hi bang bek a om i hiam? I khantohna ding ngaihsutna project/plan om lo hi ciin ka gen nuam hi. Ka pau kuaman ong hua kei le u cin, 'ZBYF in Project in Laptop leh projector' nei hi. I pawlpi khantohna ahiah lai in a mipite khantohna muh ding om lo hi. Bangcin khangto dinga, ka ngaihsutna ah, ZBYF hiam ahiah kei leh R & D hiamin i pawlpi mite zat theih dingin Project hoih tak bawl kul hi. Etsakna in, i pawlpi khangno mi 10 hiamin bati, agarbati leh gamsha puan hiam bawl dan kha khat sung training lak a, a training zawh uh ciang ei pawlpi in a bawlna (materials) ngaihsut sak in bawl sak ding a, midangte zong training pia zel ding hi. ZBC pawlpi in a marketing buaipih ding a, amau Rs.4/- a bawl leh pawlpi in Rs.5/- in zuak ding. Gamsha puan pen Kala gam ah demand sang mahmah hi. Silchar hiam Guwahati hiam a company te hoih tak hopih ding a, a khawl/ material ngaihsut sak ding hi. A puan

pen company pan a tawm zaw in a ding a, Rs.50/- in a bawl uh leh company ah Rs.70/- pia ding hi. Tuaci bang hileh khangno na nei lo vakthap tampi nasep bawl sak ding a, sum tampi tak khasimin lalutin, i pawlpi in a met mu ding a, sawma khat tampi tak hong lut ding hi. Tua bek hi lo in, Agarbati bang India gamah demand sang mahmah hi, a bawlna khawl Mizogam ah man tomno tawh kilei thei a, i pawlpi in leisak in a bawlsa uh pek nih khat metin zuak sak zel ding hi.

Tua bek tham lo i nungakte a tam theitheih siamgat sinsak in a gatsate uh ZBC pawlpi zuaksak ding, a meet pawlpi sum ah lut zel ding hi. Tua ahiah kei leh i pawlpi omna khua ah ei pawlpi mite lakah self-help group phuat a, a van zat ding uh ngaihsut sak dingin, loan khawng Rural Development Department pan ngaihsutpih a, a van zuak pen pawlpi ah a meet pek nih khat omin zuak sak ding. Hici bang pen Roman Catholic ten a pawlpi genthei khua ah nak sep mahmah uh a, self-help group phuan in kumpi pan loan ngetpih mengmeng uh hi. Mi pawlpi in zong a hih theih uh leh bang hang in i pawlpi in zong hih thei lo ding hiam? Tua bek hi loin munphiah a om hun ciang munphiah zongsak dingin a tua a zonsate uh ZBC in a zuaknang ngaihsutpih in a meet tawm khat ngah theihna dingin zuaksak ding hi. Tuaci bang hileh sep ding neilo

a vakvakten nasep mu dinga, i pawlpi khangto in, i sumpi hong ding a, computer, laptop, printing press te project kul lo in a meette in hong lei zo ziau ding hi.

I pawlpi in i lunggulh mahmah damdawi in (Hospital) bang tu in neizo leng uthuai ka sa mahmah hi. Zomi sungah MBBS nih leh khat om haksa lua dingin zong ka ngaihsun kei hi. Champhai ah hong thei hileng i pawlpi minpha in, khangto mahmah ding hi. Tu a laisim laiten Doctor hong sin mengmengin i pawlpi zato inn neih a lunggulhna tangtung sak hun mahmah ta hi. Zato inn nei zo hi leng maw i pawlpi sung panin nurse om ding a, Health Worker, pharmacy, sweeper, peon cih bang i pawlpi miten semina hoih a mu hi ziau ding a, nasemte tung pan sawm a khat kimu kik ding hi. Tua bek tham loh in panpihna kumpi (Gov't) pan muh theih lai mawk hi. Khangnoten Doctor, Nurse hong sin toto ding a, i pawlpi i minam hong khangto in Doctor ten Zokam tawh awnem takin damlote hopih in kem ding a, Zomite ki angtang mahmah ding hi. Sanggam Lushei ten zong hong zuan ding a, a meette i pawlpi ah lut ding hi.

Sanginn zong i lunggulh mahmah hi. Tu in Sesih ah a bul kipan pan hi. Apicing a hoih neih ki ut mahmah hi. Tua bek tham lo Hostel hoih Aizawl ah om thei leh ut huai semsem hi. Singtang pan a khuapi zuan ten i pawlpi Hostel ah om ut mahmah ding uh a, a

sem ding sangsia akipan peon dongin ei pawlpi mi mah in sem ding a, khangno nasep mulo te a dingin hoih mahmah ding hi.

### BANGCI CIH DING?

ZBC pawlpi ah hiang tuamtuam Relief & Development, ZBYF etc cih te om hi. Hihte nuaiah Research & Development phuan dingin i khangno laisiam/mipil MBA, MA (Eco), Ph. D, B.Com, B.A. te pen Board member ah koih a, tua ten survey hong nei in, a muh dan uh plan/project bawlin General Council in approve/pass sak ding hi. Amau kul a sak uh leh society/self-help group hong phuatsak ding a, a semte tawh MOU/agreement hoih tak hong bawling hi. Tua bek hi loin kumpi ah panpihna North Eastern Council, Central Sponsore scheme etc. leh loante buaipih ding hi. Lawhcinna a neih uh leh pawlpi ah a meet (interest) sung panin sawm a khat pia ding hi. Hih Board member ten hoih tak en dik ding a, hoih a sak kei leh action la pah ding hi. Vanzat ding zong amau mahin company ah a kul bangbang ngen in vaihawm ding hi. Tua ahih manin i khangno laisiam lungsim nei gigen a khantoh nang deih lua in ngaihsunsun mawk uh a, ahih hangin upaten a lampi zonsakin, vaihawmpih lo ahih manin bangmah sem thei loin khutzepin om mawk uh hi. Zum pai a kul leh Champhai ah mipil misiam Office pai

thei tam mahmah a, Aizawl ah zong tua ci mah, Shillong ah zong a pil a tei sem i pawlpi sungah tam mahmah hi, a kul leh a paizia thei amauten dong sawnsawn thei lai ding uh hi.

Awle, i pawlpi, i minam khantohna ding in i kalsuan dan khek hunta hilo hiam? Gentehna in mombati company bang lawhcing hileng i khangnote nasep nading honsak toto ding a, sum muhte tawh zato inn kiphuan thei in pawlpi in meetpih mahmah ding hi. I khantohna ding in step by step kul hi. Tua ahiah ciangin pawlpi upa vaihawmte hong ngaihsutpih ding in ka deih mahmah a, khangno mipil misiamte i khantohna ding in a ngaihsutna uh leh a khutsiamna uh zat kul ta hi. General Council a kinial bekbek tawh aki khangto ding hilo a, upa/makaiten i khangno te maikai a, a kulte ot sawm in tawsawn sawm zaw ni. Tua hi leh i pawlpi sung hong khangto in, hong picing ding a, pawl dang khangnoten hong lunggulh in, zukham ankhamte zong Pasion biakna lamah makaihna lampi hoih tak ahiah ding zong ka lamen hi. Pasion min tawh kipan thei leng, a lampi zong hong om toto ding hi.

---

Dr. GK NANGTE KISUAN TA

Rev. Dr. GK Nangte innkuan a nasepna ding mun cidamin tung cih thu kiza. Sia Pa in namdang kalah Mission na sem ding ahiah manin gah limci, gahpha a suah theih ngeina ding in thuumsak ni.

**KHATHUAH KISEEKIN KISINNA**  
(I Tim. 4:8) - Sm. Awi Ngaih Lun

Pasion thu pen Kha thu zong kici hi. Sawltak Pawl in hih kammal zang thei zel hi. Kha lamah iki seekna ding in akisam awlmawh pawlkhat ka neih te i holim khawm ding hi.

*Lai Siangtho sim* : Khristiante Kha an Nuntakna thu bu ahi Lai Siangtho sim tam in, a thu theihna ah hong khangsak in, Pasion itna thu zaw kimu tel deuhdeuhin meetna tampi hong guan thei ahiah manin Lai Siangtho sim tam kisin taak hi. Nidanga Pasion thu i theih leh i zak ciang bek tawh lungmuanga om hithiat ding hilo in, nisimin Lai Siangtho sim zelzel ding ahi hi.

*Thunget* : Thungetna in Pasion tawh kihona hi a, deih teng ngen in, i haksatnate tun in, i lungdamna ko a, kiniamkhiatna puan silh in Topa mai ah kun zelzel kul hi. Thungetin i Kha nuntakna no suahsak den a, Pasion tawh hong kinaisak in, Kha Siangtho huhna kingah lawh hi.

*Phatna lasak* : Pasion phat leh pahtawina la sak in i kha nuntakna ah thalawpna tampi hong guan hi. Lasiam man zong hi tuan lo in Pasion tungah phatna la ginsak himhim pen i tavuan hi. Pasion a phat dente in Kha Siangtho ompihna ngah uh a, tua ahiah manin nisimin phatna la ginsak ding hi.

Kha sungah limtakin kiseek in, kisin ni. Nisimin a tam thei bang pen Lai Siangtho sim in, thungetna nei in, phatna lasakna tawh i khangno hun zang ni.

## MURLENTE HONG KICI MAW?

- Tg. Lian Muan Kham, UBS, Pune

'Murlente laisiam ve uh teh aw!' cih kammal pen mi tampi tungpan kaza hi. Kei kianga hong gen zong tampi ka theih om ta hi. Hih banga hong gen uh ciangin ka lungsim sungah, ka siamman uh hilo mah hiven, a hang dang khat om hiven, kaci simsim zel hi. Murlen hihna hanga laisiam hilo zaw in, a mite cihtakna leh kuhkalna hang zong hizaw khathei hi. A khua a tengte pen laisiam sa a piang hi tuanlo uh hi.

A khua suak laisiam tampi om mah hi. India gam sung Zomite lakah kisuut leng, Murlen khuasuak milian tamsim om hi. A khuaneu tawh teh in pilna sang nei tam uh a, a khua a tengte in zong lamdang sa uh hi. BA zo sa 140 val bang omin kiciamteh hi. Zato lam siam zong 4 bang om a, Ph. D ngahsa leh a ngah pah ding tawh simin mi 10 phial bang om ta hi. Pastor bekbek zong 18 bang om cih te i ngaihsut ciangin Pasion thupha ahi hi.

Mi tampite in a khua-ah laisiamna a om dingin ngaihsun uh a, pawlkhate in a tuidawn peuh ngawh uh hi. Bang bang kingawh taleh, ken bel Pasion hang hi kaci hi. Nidang (Mizogam buaima or 1966 ma) hun laiin Murlen ah Pasion thu pen na buaipih mahmah uh a, Pasion pen buan cih takin nabuan uh hi. 'Murlen Mihlim Sangte' cih bang gen ding mi na om uh hi. Kha lam General zong na om hi (Pu Gin Khaw Hau f/o Rev. Suan Khan Thang hi). Tua bangin Pasion pen na zong uh a, Zomite leh Mizote zong kilem takin na tengkhawm thei uh hi. Tua in Pasion ompih khua ahihna langsak hi. Tu dongin zawla (lawma)

kinei tampi na om uh a, unau - pata banga kibawl zong tampi mah na om uh hi.

Anihna ah, khua siangtho ahi hi. Kei theihphak ciangah, Murlen a Zu kisa pen gending omlo himai hi. (Kua zakdah loh dingin) Vapar panin a tamzaw ten Zu la uh hi. Murlen ah Zu lei ding pen a om ngeilo phial hi a, tuni dongin khamtheih guihtheih ah zong khua siangtho pawl hilai ding hi. Grape tui a om zawh tawmkhat in khangnote nuntakna palang deuh bek ven. YMA te nasepna pen kizahtak lai mahmah a, mite thudiklo ngamlo uh hi. Mizote tawh a ki-om khop hangin, amau zong hong neu-et thei tuanlo uh a, eima pau ciat zangin kiho theih a, nuam lel hi.

Hih thu teng i genzawh ciangin a kitel mahmah pen, Pasion thupha piak khua ahi hi. Tui lah nuam in, a gam lah hoih a, sing zong tam in, gamsate tuallenna munpi zong ahih manin *Murlen Sanctuary* kici hi. Gamham zong tamlai a, a khua pana tai 5 khawngah keen khat om in, *Khampi* kici a, tua keenah phialphiah ten bu sep uh hi. Nitak lam ciang lengkheh ngeingai theizel uh a, muhnop mahmah

in gen uh hi. Tua vasate pen Mizo pauin Vamur ci in, Murlen (Vamurlen) cih min hong suak hi.

Mite hong theihna lian pen ahieh leh Pasion thupha piakna tungtawna gualzawhna a kineihna ahi hi. A sunga tengte pen laisiamsa leh mite sanga siamzaw hi tuanlo uh a, kuhkal leh citak takin nasem uh ahieh manin Pasion in thupha a pia hizaw hi. Thupha piaktakin sem/sim cihna hi. Haksatna tampite lungkia hetlo in phul ngam uh ahieh manin Pasionin hehpih a, gualzosak hi.

A dang khat leuleu ah, a mi tengte in mite enna lungsim nei in, lungsim khauhsak uh ahieh manin a lawhcing suak uh hi. Nuamtaka laisim pen tawm mahmah veve uh hi. Sum lam haksatna hi in, mite muhdahna hita leh a tuamtuum haksatna tampi mah tuak uh a, ahi zongin mi a batloh ding uh in thuk kenkan uh hi. A tawpna ah, lawhcinna in na ngak lel hi.

Sum neihloh manin mite lakah kihel ngam loh hun tampi om thamtham hi. Lawm a kineih ngam lohna hang zong i zawn leh ngau hang hizel hi. Ahi zongin Pasion mah beel cinten in Amah muang peuh le'ng, Amah in a hunhun in hong huh zel hi. A simte a hahkat ban ah, nu le paten zong thalawppih uh ahieh manin, Murlen pen 'laisiam khua' kici hi. Laisiamna dingin lampi tuamtuum - cihtakna, kuhkalna, thukzawhna leh mite bat nopna lungsim i neihkei leh, kilawhcing tuanlo hi. Tuhun ciangin Murlente bekbek cih

hun hinawn lo a, Zomite khempeuh in i tate pantah in, Sesihte, Vaparte, leh Zomi khua dangte min i lawh hun hita hi. Tua bang hun ding ngaklah mahmah ing. Nu le pate hong pang ding a, khangnote zong hong hanciam ding uh hi.

Pilna a pia pen Pasion hi a, Amah a muang mite mi hampaha hi. Tui dawn hang hilo zaw in, Pasion a zahtak mi leh khua peuhmah Pasion in lamsang ding hi. Haksatna thuk nuamlo a, khua nuam isak laiteng pen laisiam mahmah nading leh khantoh veva nading thu omlo hi. Paunakin 24:10 sungah, 'Haksatna natuah ciangin na lung a kiat leh, a ginalo mi nahi hi' ci ahieh manin, hatsatnate ah lungkia mai lo a, hangsan taka i phul ngam ding ahi hi. Tua in gualzawhna lukhu nelkai hong ngahsak takpi ding hi. Zomite hanlungciam, khangto diam!

## AREA KHAWMPI TUNG DING

October ni 1-3, 2010 sungin ZBC Area tengah khawmpi om ding hi. Khoppi tunna ding : Champhai Area - Ngaizawl, Hnahlan Area - Hnahlan, Siakal Area - Teikhang, Aizawl Area - Aizawl Ramhlun 'S' ah tung ding a, Shillong Area in Shillong ah zang ding hi. Khawk pawlkhatin khoppi ah thu leh la kidemna neih sawm uh a, pawlkhatin sports tawh thuah sawm in, khawk pawlkhatin thugen khat vet guai in hun zat sawm uh hi. Khoppi in Jesu Khris nopna thupha hong tun ta hen!

## ZBYF IN KUM 22 CING TA

ZBC kumcin khawmpi thukimna om angin March 5, 1988 in ZBC khangno kipawlna ZBYF kipuan hi. ZBYF a din akipan in tuni ciang dongin makaite leh memberte pankhop siamna hangin ZBYF hoih takin kalsuan to zel ahiah kilungdam mahmah a, hong makaih den i Topa Pasion tungah lungdamna lianpi iko hi. ZBYF day hong tun simin member mualliamsate i phawk a, hih ni manpha tak hong zatpih thei lai leh cih kilunggulh mah taleh, Pasion vaihawmna ah ei mihingte in sep theih kinei lo hi.

Leitung kipawlkhopna bang lel a ngaihsut khak loh ding deih hang. ZBYF tup leh ngim in Pasion sungah khangnote in zungthak khak theihna dingin khangnote puah a, pattah a, a siangtho nuntakna neih theihna ding a lamlah a, makaih ahi hi. ZBYF i cih pen mi nih leh khat deihna tawh kal kisan ngei lo hi. A gambup huapin vaihawmna Annual Council leh Central Committee om a, branch BYF in tangmi dinga a teel khat te uh a member ahi hi. Annual Council in kum khat sung nasep zia ding kum tawp in geel khin a, Central Committee in Annual Council hun ma sunga sep kul bawl kul leh vai kisan teng a sai banah AC thukimna te sem in kal suan hi. Tua ahiah manin vaihawm dinga tavuan piakte in dinmun poimawh tak leen uh ahiah manin Committee cihte ah ut leh pai a, ut loh leh pai loh cih tawh kalsuan theih hilo hi. Pasion zahtakna tawh hahkat taka a sep zelzel uh kisan hi.

ZBYF in khangnote Pasion thu leh la a khantoh theihna dingin a lam tuamtuamin na sem hi. Seminar bawl in, la lama khantohna dingin solfa training piak leh khangnote zat theih ding labute bawl a, lasak kidemna hun zong bawl zel hi. Kumthum halin khawmpi nei a Pasion thu tawh limtaka kihanthotna hun in zang hi. Out door game te tawh zong kimawl kidemna nei thei zel hi. Kumsimin project bawlin a lawhcin theihna dingin branch te tungah budget bawlsak hi. Khasim khangnote thukizakna ZBYF Taangko suaksak hi. Hi tengteng khangnote Pasion ah hatna nuntakna a neih theihna dinga nasepna vive hi ahiah manin thungetna leh piakkhiatna tawh limtakin pan kul hi. Kum 2011 ciangin Aizawlah Triennial khoppi neih kisawm a, 2013 ciangin Silver Jubilee zat ding kigeel hi. Hici bang vai lian kineih sawm ahiah manin khangno member te in pan lak a, sum piak a kul hun ciang pia khia thei ding leh thatang tawh sep a kul ciang sem khia thei dingin iki hansuah a, a lawhcin theihna dingin thungen ni.

A 22 veina ZBYF Day a zang mite khempeuh tungah Jesu Khris nopna thupha hong tung ta hen. Hih ni in khangnote adingin hoihna nam tuamtuam hong tun hen la, Pasion itna leh lunggulhna thak khangnote in a ngahna ni manpha hong suaksak ta hen. Amen.

**-Secretary, ZBYF**

## LUNG DAM KOHNA

Tg. Suan Lian Mang in Zokhawthar ZBC pawlpi zat dingin Fan (pangka) khat hong letsong a, pawlpi mite kilungdam mahmah hi.

Lia Zam Khan Huai Zokhawthar in Nekk Hawthawm hawmna hai lian khat leh nekk Hawthawm hai kai khopna kuang nih hong letsong a, pawlpi mite kilungdam mahmah hi.

Huhna hong pia sanggamnihte tungah pawlpi in lungdamna lianpi kiko hi. Topa in a zah tampi in thupha hong piaksak ta hen.

*-Upa Sian Lian Mung,  
President BYF Zkt.*

## DAMNA NGAH

Nu Cing Lam Lun lungtang natna hangin Evan Lian Go sam a, Sia Lian makaihna tawh ni 4/8/2010 in mi phatuamngai pawlkhatte tawh antang thungetna nei uh a, Nu Lun in damna ngah hi. Sia Lianin Nu Lun pasal councelling neihpih a, kha lam sa lamah damna ngah a, a zing ciangin Rev. Cin Khan Tuang Pastor in tuiphum hi. Pastor in Pa Nang Khan Lian leh Nu Tuan Suan Niangte nupa Pasion min tawh letthat hi.

## SILVER JUBILEE ZAT SAWM

March 2011 ciangin Sesih ZBC leh Champhai ZBC pawlpite in pawlpi a din zawh kum 25 cinna Silver Jubilee zat sawm uh a, tua hun adingin limtakpi in pan a lak laitak uh hi.

*September 2010*

## Dr.JM PAUPU IN LETSONG

Rev.Dr. JM Paupu in ZBYF Silver Jubilee project a dingin Rs.5000/- hong letsong a, kilungdam mahmah hi. Neih man hilo khangnote khantohna dinga nasepna thupi sim a, hong kipiak khiatna hangin ZBYF in Rev. Dr.Paupu tungah lungdamna lianpi kiko hi. A zah tampi in Topa in na phungvuh ta hen.

*-Secretary, ZBYF, Mizoram.*

## BSI IN BOOK SHOP NEIH PHAL

ZBC in Bible Society of India (BSI) ah Book Shop (Laibu sai) bawl ding a nget pen hong sansak uh a, Pawlpi makaite lungdam mahmah uh hi. Tu in ZBC in BSI te laibu bawlsa peuhpeuh Lai Siangtho akipan laibu tuamtuan zuak theihna ding phalna ngah hi. Hici bang deihsakna i ngah pen Topa thupha hi.

## MIXTURE LEI

Ngaizawl ZBC in pawlpi zat dingin Mixture Rs.16000/- in lei uh hi. Pasionin i pawlpi a ompihna lamdang hi. Tawm leh tamin sai lo in a kul hunin pawlpi van zat ding akisapna bangin pia hi. Topa minthanna hi ta hen!

## CAMPING BAWL SAWM

October kha ciangin Champhai ZBC pawlpi in Gospel camping bawl sawm hi. Hi hunah gup ngah mi kibehlap a, kha lamah khanlawhna a tun theihna dingin thungetna ah pawk ciat ni.

## Kuaten bang gen?

Kisiik ing na cih hang na kikheel tuan kei leh lei kan na siik ding om kei.

**-Pa Thawng Sian Thang, Mln.**

ZBC ah kum 10 val kistem ta ahiah ciang Sia hih phu kisa veve ta ing.

**-Pa Mamuang, Cpi**

Nuvo..pawlpai silver jubilee tiang bel.. sa tampi ne tawng..

**-Pa Sing Mung, Seh.**

Pa, hi ci'n om den ding i hiam?

**-Lia Cing Eng Mawi, Cpi**

Ka lamlam leh ka gil lian deuhdeuh, ka meel lah no suah deuhdeuh, Pasian thupha hiveh aw..

**-Evan. Lian Go, Hln.**

Pasian pahtawi meet sa ing. Ka deih mahmah thupha saan ding a ngak hi ing...nuam ei..

**-Pa Lang Deih Piang, Cpi**

Kam tawm pau in la, limtakpi in na sem phot leeng, a lampi om in ciai.

**-Pa Z.L.Thang, Vpr**

Murlen leh Champhai kikal khawng khap khat bek pha.

**-Upa.B.Cin Ngaih Lian, Cpi**

Tavuan tam, sep ding tam kibuai thei lua veh.

**-Upa Sanga, Vtr.**

Inngak ding dang om tuanlo ahiah manin ka tawh (key) in a ngak phot mah ngai lo diam?

**-Tg. Sawm Lian, Cpi**

Ak ek bangin uih leeng, mun tampi zeel ding hi hang.

**-Pa Ng. Kh. Zam, Cpi**

Committee kul, inn ngak kul, Vapar om kul, Champhai om kul, buai lua ing. Ka nungak sungin teek man liang ning..hi..hi

**-Lia. Nulian, Vpr.**

Tulai puankhui sinin manlah mahmah vengin, Aizawl lamte na dam zel uh hia?

**-Lia Khawl Nuam, Mln.**

Pau mel lo napi ing, ka lungsimin thu tampi gengen!

**-Upa DK Mang, Mln.**

Khatpeuhin la sa dingin hong cial khak leh ci in ka inring reng e..

**-Lia Man Deih, Azl.**

Champhai tawh kizaang ka hiam, ka ihmut suaksuak, ei thumpih un.

**-Lia Muanpui, Hmn.**

Lai ka sim ciang nai 8 tan hak thei lo napi ing, T.V. ka et ciang nai 12 tan lau dek suai lo...

**-Lia Cingnu, ZBC Office nuai**

B.Sc. kizo, M.Sc kisin lai, a picing khat hita hilo kahia le..lawmte, na zong simsim ve vua..

**-Tg. Suan Ngaih Cin, Shl.**

La kasak ciang ka lungkim ngaungau hiveh aw, la sa dingin hong cial zel ve vua, foreign ah zong poi tuan kei.

**-Lia Khan Cing, Shl.**

Bangmah ihih tuan loh hang Sia Kham ci a hong kisap nuam mawk ei.

**-Pa Kham, Hln.**

Biakinn sungah lusu kei in, veih na tha kha ding hi.

**-Nu Sian Ning, Mln.**